

A SOS MONTAGNINOS

Sos veros fizos de s'istirpe antiga
los agatamos in su Gennargentu;
ch'in d'unu tristu istoricu momentu
los hat ispintos sa zente inimiga.

Prite s'orgogliu de su Sardu veru
non s'est assuzettadu a su giuale
de su cartaginesu rude imperu
e cheret libertade naturale.

Lottende chin su vrittu e chin su vamene
e dognia zenia 'e disagiu,
hant resistidu e prantadu coraggiu
e campein de cassa e bestiamene.

Hant tribagliadu sas robas locales,
imparadu diversos mistieris:
giravant sa Sardigna ventuleris
vendende sos "oggettos" manuales.

Ma in cumpensu cando in sa bassura
su logu fit siccadu e "ingiallidu",
biviant che puzones in su nidu
circundados de lughida virdura.

S'abba pura iscazada dae su nie
chi bundat frisca in sas limpidas venas,
regalat in s'istiu oras amenas
a sa zente chi abitat inie.

Certu sa gioventude de cust'era
non si cuntentat solu 'e abba giara:
ma cheret bider su progressu in cara
andende peri in terra istraniera.

Però como b'hat crisi generale,
non b'hat iscampu mancu in atterue
e sa vida est difficile tottue:
semus torrende in segus, ite male!

Ma in mesu 'e peleas e de ois
affrontade sa vida chin passenzia,
chin coraggiu, onestade, "intelligenza",
a ite valet lottare tra vois?

Sa paghe, sa cuncordia, s'amore,
serenidade e progressu produent,
s'odiu, sa venditta los distrustent
e battini ruina e disonore.

Orgoi

LUSSORIO SALIS
OLIANA